

四庫全書

史部

欽定四庫全書

史部

江西通志卷七十三

詳校官監察御史_臣左周

檢討_臣德生覆勘

總校官知縣_臣楊懋珩

校對官典簿_臣劉景岳

謄錄監生_臣陳賓

欽定四庫全書

江西通志卷七十二

人物

袁州府

漢

陳重字景公宜春人少與鄱陽雷義為友俱學魯詩顏氏春秋郡太守張雲舉重孝廉重以讓義雲不聽明年舉孝廉重與俱在郎署有同署郎負息錢數十萬

貫責主曰至重密以錢代還終不言惠又同舍郎有告歸寧者誤持隣舍郎絳去主疑重所取重不自申說市絳償之後寧喪者歸以絳還主其事乃顯後與義俱拜尚書郎義黜退重亦以事免復舉茂才除細陽令政有異化拜侍御史

後漢書

按人物志陳重與雷義後皆不仕同隱居雞足山卒合葬今其地名陳雷里

晉

袁京宜春人不樂仕進隱居府城東北五里山時人因
名袁山郡守為立高士坊

林志

唐

彭雲構宜春人自幼力學通陰陽圖緯隱居不求仕元
宗遣使以蒲輪徵之至再始行命之官辭歸孫伉舉

進士

林志

劉松字稽美宜春人累舉不第集郡人天寶已後詩四

百七十篇為宜陽集六卷

唐書藝文志

彭蟾字東瞻好學不仕以處士稱重修唐韻及著鳳池本草廟堂龜鑑共一百二十卷有詩十一首見宜春

集

縣志

韋無強宜春人隱居十五年不出戶郡守董禎欲表不求聞達科固辭不就為立逍遙坊表之

同上

彭伉宜春人貞元間進士授石泉縣令歷官岳州錄事

叅軍有政聲

府志

鄭史字惟直宜春人開成進士為易學博士積官永州

刺史有賦百篇又有詩十二首見宜陽集二子啓谷
人物志

盧肇字子發宜春人兒時見宜春令盧萼奇之曰子異
日當有聞肇於是益力於學舉會昌三年鄉試入京
獻書侍郎王起時起知貢舉遂擢進士第一授潼關
防禦判官初肇之未舉也李德裕謫州長史殊遇肇
後肇應進士德裕復入相見肇至曰吾喜為金榜得
狀元矣遂魁天下雖受裕知絕無倚附久之使相盧

商太尉裴休左僕射盧簡求先後奏辟從事稍遷著作郎除倉部員外郎充集賢院學士持節歙州諸軍事肇於是觀日月之運察盈虛之理為海潮賦成上之詔褒諭宣付史館移鎮宣池二州遷吉州刺史卒所著有文標集子文秀咸通中進士為長安令有聲官至弘文館學士

豫章書

易重字鼎臣宜春人會昌中張濱榜進士第二會有詔覆試黜濱以重代之官至大理評事著文千篇

安志

李潛字德隱宜春人會昌中舉進士其謝座主王起詩
有文學宗師似秤平無私三用佐貞明之句蓋起三
知貢舉也唐詩紀事

黃頗字無頗宜春人韓愈為州刺史頗師之為文章與
盧肇齊名素不相下頗鄉試高等而肇狀元及第會
昌末頗亦舉進士為監察御史有文千篇行於世唐
撫言

袁皓字退山宜春人博學工著述咸通進士任撫吉二

州刺史有治聲龍紀元年自集賢殿圖書使出採訪
圖書著碧池書三十卷自稱碧池處士

林志

鄭谷字守愚穎悟絕倫七歲能詩司空圖嘗與其父史
同院見谷奇之拊其背曰當為一代風騷主光啓三
年進士始為京兆府鄠縣尉後為拾遺補闕乾寧四
年以都官郎中退居於仰山東莊之書堂以卒谷詩
清婉明白為薛能李頻所稱僧齊已有詩名詠早梅
云前村深雪裏昨夜數枝開谷曰數枝非早也未若

一枝齊已不覺設拜士林呼為一字師谷始登第與
許棠任濤張蠩李栖遠等十人同有聲謂之十哲而
谷尤以吟詠顯有詩四百篇嘗從僖宗登三峰朝謁
之暇寓止雲臺道舍自編其集曰雲臺編宜陽集各
三卷其鷓鴣詩尤工世號鄭鷓鴣

人物志

唐廩萍鄉人乾寧元年登進士科官至祕書正字集貞
觀以前文章為貞觀新書三十卷

全唐詩小序

按袁州舊有宋嘉定間志載唐人宋迪以下或有

詩見於宜陽集及登第年甲互見於題名記者凡

五十有七人今不具錄

原跋

盧邈肇族子唐末預湖南計偕舉進士獻迴文詩三百

首官至祕書省正字

人物志

南唐

盧絳字晉卿宜春人自言唐中書舍人肇之後讀書略
通大指喜論當世利病舉進士不中往來金陵丹陽
間久之乃上書論事陳喬異之用為沿江巡檢募亡

命習水戰宋師來討以絳為凌波都虞候守秦淮水
柵屢勝諸將忌其能說後主遣出授潤州節度使劉
澄出送降款絳率所部走保宣州金陵陷絳獨不降
謀南據閩中過歙州怒刺史龔慎儀不出迎殺之而
行太祖使絳弟襲招之至京師授冀州團練使遇慎
儀兄子穎於朝曰是殺我叔父者執至殿陛訴冤詔
屬吏樞密使曹彬言其才畧可用願宥其死使自効
太祖曰是貌類侯霸榮何可留也斬於西市

南唐書

王穀字虛中宜春人南唐初登第長於樂府有鴻門詞

苦熱行玉樹曲膾炙人口

林志

李徵古萬載人篤學有詞藻登第後以樞密副使除本
州刺史離都日李主賜以內庫酒入宜春界每經一
村落必召耆舊親知藉地飲酒盡歡而去到郡靜理
壁立凜不可干嘗以私財百萬代鄉人輸稅尋以事

賜死

人物志

宋齊邱字子嵩萬載人父訥攝鎮南軍節度使推官守

大理評事齊丘少孤好學善屬文兼習機變權詐之術豫章亂遂隨衆東下時李昇刺金陵延四方之士往依焉甚被親禮昇欲進用之為徐溫所惡以為殿直軍判官溫卒擢拜左司員外郎累遷諫議大夫兵部侍郎叅議機密尋授洪州節度使璟襲位復召為相俄乞致仕出為浙西節度使表乞歸九華賜號九華先生封青陽公所著化書理訓各十卷

南唐書

彭世昌字襲之宜春人謹身修行以名節自持楊行密

據淮楚召為長史未幾謝病歸有豪猾子數百為羣劫之曰吾徒遭亂世未有所托今德足而智有餘莫若君請隸焉世昌正色叱曰梁汴之間真人出矣不知命數而逞無窮之欲智者不為也敢辭復請又辭三請之不從設棘箐繫其上而焚之諸孫仕宦有聲

人物志

宋

劉式字叔度新喻人明春秋公穀之學唐末舉進士是

時張洎主文衡獨放式一人太祖平江南羈旅入京
歷鴻臚大理丞出監通州和豐倉入判三司都磨勘
司時財賦充斥無所明辨式條其闕漏創主轄支收
司奸吏畏服淳化中齎冊往諭三韓轉太常博士賜
玉書法帖十六軸終刑部郎官子孫宦蹟各有傳見
臨江府人物志

按寰宇記宋初未置臨江軍時新喻尚屬袁劉應
入袁州人物

易言字應之宜春人少任俠有口辯真宗朝蠻寇宜州
邊帥不能制募辯士往說之言應召單騎往酋長迎
待甚恭竟歸順休兵真宗嘉之賜以官後元昊擾邊
近臣多薦言可任上見其老不欲遣行令赴流內銓

任樞府司戶叅軍

林志

李奇字子正宜春人任職方員外郎性慷慨不事產業
悉以祖產分兄弟仍戒子孫不得追取既卒族人端
以詩哭之有祖來產業分兄弟身後詩書遺子孫之

句人物志

易著明字晦之宜春人博學精於聲律累被鄉薦時人
為之語曰宜春易著明擲地作金聲與石曼卿為詩
友天禧間賜三班奉職終於左班殿直

同上

李衢字叔達宜春人唐西平王晟裔孫大中祥符登第
官至屯田員外郎嘗倅筠陽寬慈不擾後以子貴贈

特進

同上

夏侯錫分宜人天禧進士衡州司理叅軍稍遷吉州判

官歷知南康興化軍皆以善政聞治平中轉朝奉郎
都官屯田郎中致仕子公績元豐進士

林志

李士安字永和宜春人以特奏同學究出身為人不妄
喜怒累任州牧後請老得養生之術視聽不衰年九
十七卒

人物志

李士燮字和甫初名梁登慶歷六年第為人剛正不撓
嘗知郴州吏民畏愛未嘗見其笑容仕至職方郎中
同上

李觀士安從姪慶厯二年試南宮賦偶失韻主司嘉其
策特奏名登第時方弱冠知清江縣事熙寧初為大
官令尋言役法不便出倅括蒼元祐初監江州太平
興國觀司馬溫公為相以書召觀比至京溫公已薨
除虔州不就請監南嶽廟以歸觀少好神仙嘗遇異
人劉海蟾以得道自任而排斥釋氏卒年七十三同上
朱彥博字元施萍鄉人嘉祐進士通判潁州秩滿上神
宗皇帝書極言當世利害召對稱旨遷廣西江西運

判歷知虔號解三州及湖北憲副所至有聲

同上

彭持字知權分宜人少喜學西漢文為諸生時知軍州
事張顥稀簡接士求見者先令詩賦方得通士無敢
進者持奮曰是謂秦無人矣因入謁顥令作日新之
謂盛德賦藏器待用詩皆立就張大稱賞貢入太學
與臨江孔武仲齊名擢進士甲科元豐間累遷司農
丞出為監司號霹靂手終江西提舉

林志

高漸字善時萍鄉人熙寧進士寧鄉尉論新法有行而

未便便而未盡善者凡十策調廣州錄事叅軍建中
靖國初再疏請正元祐元符二后君妾之分崇寧初
編管撫州列名黨碑大觀二年預八寶赦與起居舍
人黃庭堅等同時復官

人物志

歐陽中立袁州人初試部郎上書言新法不便以司馬
光門人坐廢遂不復起卒弟子私謚節孝先生

同上

曹傳宜春人元符三年與弟藻子遷同登進士人名其
堂曰三桂傳官至朝請郎知常州藻宣教郎知益陽

縣遷通直郎知郴州兄子邁崇寧中進士積官中奉

大夫廣西運判直祕閣兼權安撫使

同上

彭俞字濟川宜春人少隱集雲峰學邃於易自號連山
子紹聖進士知溧陽縣理冤獄甚多監司連薦之稍
遷至朝散郎所著有循吏龜鑑十二卷文集二百卷

林志

沈莊可分宜人宣和進士知錢塘縣嗜菊庭植嘗數百
本晚年退居益放情於菊後以九月九日死朱子哭

之詩有正當地地下修文日恰值人間落帽天之句人
物志

按朱子哭沈莊可七律全篇見人物志

李格字承之萍鄉人幼孤力學雖執爨手不釋卷既長
通五經目重瞳觀書五行俱下元符進士許翰薦於
朝以作詩諷新法被論下獄竟得直歷職州縣同官
多憚之同上

湯夢觀萍鄉人崇寧進士知循州時蠻寇劫掠旁郡恒

相戒不犯夢觀境事聞朝廷嘉之除六路坑冶鑄錢

提點

同上

郊元鼎字元之宜春人學問行誼為鄉里所推重數舉

不第無嗣郡中達官出其門者每歲拜其墓

林志

蕭杞萬載人宣和進士學邃於易精大衍之數歷官通

判廣州軍州事有治聲稍遷至市舶提舉

人物志

鄭銓字應權宜春人學通六經宣和間兩貢上舍不偶

棄歸學者踵門日衆金人侵江西銓上書知州事王

仲嶷言時事責其守城著排姦黨說極論崇寧人才

之弊

同上

張瑄字子律宜春人少從學郊元鼎熟於典故歷官州縣以才諳稱立朝靖重不苟守嘉興卒平居不事生產仕至二千石喪歸貧無廬其清約如此然勇於為義周人之急未嘗以匱乏辭子嗣古紹熙進士歷起居舍人官至中奉大夫直龍圖閣致仕嗣古有文名慶元以後凡郡邑紀述文翰多出其手

同上

羅尚友字明善萍鄉人少負俊才登進士第授武昌軍節度推官時中丞李常為帥每燕集必召尚友凡樂語詩詞皆即席成因目為席上才子同上

黃嘉萍鄉人靖康初太學生從陳東伏闕上書請誅蔡京及用李綱退詣開封責府尹王時雍曰初以尹獻熙豐十事將喜有為乃今奸邪如此時雍唯唯執政者見嘉輩論事曰諸公日止食國家二升米耳吾徒有愧多矣後終廉州司法叅軍

林志

歐陽椿字永年分宜人六一先生之族紹興進士主瑞
金簿稍遷至道州判官改判臨江軍轉永州教授未
老致仕蕭散林泉號宜林老人有自修集行於世同

上

譚綺字德新萍鄉人少嘗學問稍長勇健過倫應募從
康王使河北授承事郎及即位綺掌飛龍內廐一日

間加十三資官至團練使

府志

潘修字文叔萍鄉人年十七領鄉舉入京獻書宰相張

浚隆興初以累舉特奏名陳時務六事從叅廣西軍
事討平洞賊李楫又上言二廣通販鹽法事宜與當
國者異竟格其實不行致仕

人物志

趙善堅字德固宋宗室家宜春乾道進士簽書婺州判
官朱子為浙東常平使器之歲旱賑卹有條所全活
甚多歷官皆有治聲

林志

孟浩字養直宜春人乾道進士知武寧有聲王藺自豫
章召叅大政力薦之朝選國子監丞出知湖州與貴

幸忤罷歸起為潼川路轉運判官尋以直祕閣提舉
四川常平捐廉不妄取與強毅精敏洞見事情常以
州判官攝臨江軍奉給一無所受

同上

按孟浩所著有魁技集

文彥直字益之萍鄉人性好學雖避寇山中猶誦讀不
輟紹興初以恩補漢陽軍事判官終淮陽軍節度推

官

同上

羅長康字偉正宜春人進士歷官寺丞出知永州迎其

父以養因名州署之後堂曰戲綵待制胡寅記人物

志

夏執中宜春人成恭皇后弟補承信郎閣門祇候遷古武郎閣門宣贊舍人累遷奉國軍節度使加少保初執中與其微時妻至京宮人諷使出之擇配貴族執中弗為動他日后親為言執中誦宋弘事以對后不能奪既貴始從師學作大字頗工復善騎射高宗行慶壽禮近戚爭獻珍瓌執中獨大書一人有慶萬壽

無疆以獻嘗為館伴副使連射皆中金人駭服孝宗
聞其才將召用之辭不就 宋史

宋斌袁州人少師朱子慕學甚篤至老不移臨安尹趙
與懽延之事以父行奏乞用旌禮布衣故事不報 浙

江流寓志

胡安之字叔器萍鄉人受業朱晦庵經史疑義多所著
述郡守程許葺南軒書院聘安之主席學者稱自齋

先生 林志

孫億字延齡分宜人進士知吉州永新縣民歲市繡六萬餘匹主外計者收帑錢以供他費給鹽以償繡直億發其弊吉租歲收四十萬斛漕臣意在聚斂戒庾吏收什二以充羨餘億拒臺命出納一用倉式卒余靖為志墓

林志

孫汲字公善分宜人寄籍臨江應舉授朝散郎監司知其才檄權吉州吉素號煩劇汲居不越月境內稱治

人物志

易充字正翁分宜人幼聰敏拔羣博通易書詩號三經處士教授鄉閭遠近從學者甚衆所著有中洲文集

林志

李公凱字仲容宜春人撰毛詩句解二十卷宋自淳熙而後說詩者率遵朱子之傳去序言經仲容獨取呂氏之書彙括以淑後進亦異於勦說雷同者矣稽諸
袁州府志歿而不書其官閥門世無從考云

曝書亭

集

晏又字明舉宜春人風度秀整主趙崇雍家後崇雍逮

繫又自請詣獄俱以瘐死

人物志

元

趙崇字榮甫分宜人由吏學發身仕至朝請大夫萍鄉
州知州致仕子彥文以賢才徵知閩縣事

同上

歐陽玄字原功號圭齋其先分宜人祖遷瀏陽玄魁湖
廣鄉貢進士及第歷官翰林學士承旨封楚國公贈

大司徒文章道德師表當世所著有圭齋集

同上

彭應雷字震卿分宜人延祐間舉儒士授南寧路判官
稍遷蘭谿州同知有清白聲擢知象州引年致仕林
志

夏鎮字定遠宜春人以春秋登進士授茶陵州判官終
奉訓大夫學行端飭為文章簡嚴有法度學者多宗
之同上

哈雅字伯源高昌人祖為袁州稅務大使遂為宜春人
哈雅登至正進士授承事郎進賢縣達魯噶齊興革

利害茂著廉勤飾公宇新學舍為士民仰戴善屬文
人物志

彭繼凱分宜人至正末歐普祥陷袁州繼凱募義勇起
豐樂鄉迎戰大破之會安福義士袁明東等亦引兵
來賊退走州遂反正乃下令禁殺掠修城池繕甲兵
弔死恤孤民賴以安迎舊守寶童歸嫉其功令刺客
殺之明一統志

黃盅字子中萬載人受學於臨川吳澂澂以子妻之至

正丁卯舉於鄉授龍泉縣學教諭激嘗題其書堂曰

大本

林志

趙若燭字竹逸景定進士子嗣誠博通經史宋亡不仕
及其門者甚衆著有尚書毛詩箋註

府志

夏以忠字尚之宜春人宋信王夏協旅孫以春秋試大
都路流寓科第二授翰林國史院編修官調國子助
教遷太史院都事洪武元年明師克燕悉官其知名
士以忠獨以老病辭詔許歸會遣使搜訪元史強之

如江廣以忠辭不得命行至番禺卒太史金華蘇伯

衡著文哀之

林志

明

劉迪簡宜春人學邃於易詩春秋吳元年徵入京授尚

賓館副使陳時務五十條及進皇王大學通旨奉詔

使交趾至南寧道卒所著有尚賓集孫衢舉於鄉揚

州府同知有政聲

人物志

劉仲質字文質分宜人洪武初為宜春訓導被薦入京

擢翰林典籍奉命校正春秋本末十五年拜禮部尚書帝以天下郡縣並建孔子廟而祀止京師典禮未備命仲質議之仲質乃與儒臣奏定釋奠禮儀頒行天下學校每歲春秋仲月通祀孔子如儀時國子學新成帝將行釋菜侍臣有言孔子雖聖人臣也禮宜一奠再拜帝曰孔子明道德以教後世其可以職位論耶今朕有天下敬禮百神於先師禮宜加尊崇乃命仲質詳議仲質請帝服皮弁執圭詣先師位前再

拜獻爵又再拜退易服乃詣彝倫堂命講庶典禮隆
重稱陛下之意詔曰可又立學規十二條合欽定九
條頒賜師生是年冬改華蓋殿大學士帝親製誥文
賜之坐事貶御史後以年老致仕為人厚重篤實博
通經史文體典確不尚浮藻常當帝意焉

列卿錄

劉澤民字朝佐宜春人邃於經術能詞章洪武元年以
賢才舉授縉雲知縣有政聲民稱劉父陞嘉興府同

知林志

歐陽貞字元春分宜人從學士揭傒斯鄉進士夏鎮學
工古文元季不仕洪武初以易經魁江西鄉試授考
城主簿改扶溝以老歸所著有周易問辨三十卷史
提鉤七十卷餘學初集龍江叢稿東齋寓錄貧樂集
自號石戶農

人物志

簡迪字居易萍鄉人洪武初以明經舉充儒學訓導太
守朱守仁以學行獨高薦陞本府教授至京試吏部
優等除監察御史遇事敢言明年以疾致仕自號薌

溪老人 同上

袁天啟分宜人元末歐普祥陷袁州天啟集民兵禦之不
克賊怒屠其鄉天啟匿江灣柳下獲免洪武初舉儒
士授本縣儒學訓導卒

安志

龍瑄字克溫宜春人家世襲父職遂居南京少警敏博
涉經史遨遊四方與丘仲深羅彛正陳公甫為布衣
交重然諾尚風義朋游有急揮金如土苴江湖間聲
稱籍甚曰過金陵不識龍克溫是徒行也著作甚富

寓荆南築室海子山有鴻泥集在金陵有燕居集自
號半間居士東江顧清作半間居士傳子寬字致仁
弘治癸丑進士官副使歸入苕溪詩社與劉南垣齊
名其詩如姑蘇道中云野鶴巢難定春蠶繭自忙寒
夜云氣回簷雪融還細雨濕樓烟重不飛皆濯濯有
雅致惜其集不傳

列朝詩傳

龍儀字希文萬載人進士授永壽知縣廉潔嚴明人懷
其德累遷刑部郎調為黃州同知解散賊黨境賴以

安置學田贍諸生膏火陞山東叅政著有龍江別集

若干卷

陝西名宦志

黃子澄名湜以字行分宜人洪武十八年舉會試第一
進士及第授翰林編修進修撰伴讀東宮累官太常
寺卿建文帝即位命子澄兼翰林學士與齊泰同倚
任遂謀削諸王燕師起即以誅泰子澄為名會耿炳
文李景隆相繼敗燕師數勝解子澄官密令募兵於
外至蘇州與知府姚善倡義勤王京城破欲與善航

海乞兵善不可乃就嘉興楊任謀舉事為人告俱被
執子澄至成祖親詰問之抗辯不屈磔死年五十一
族人無少長皆斬姍黨戍邊一子變姓名為田經遇
赦家湖廣咸寧正德中進士黃表其後云

列卿錄

按福王時贈子澄禮部尚書謚節愍又朱孟震集
載子澄有後一條云靖難初子澄攜四子及一孕
妾逃崑山追捕甚急有太守某者召諸子謀令長
子隨父就逮而三子改姓田孕妾復生一子公死

難後太守求其尸莫蘇之馬鞍嶺紀事於石納墓
中有貴官欲奪其地訟之官遣司理某勘之至墓
所震雷一聲挈碑石而出始知為公墓司理具牲
醴設奠貴官媿而止今田氏代有顯者隆慶中妾
之子孫始歸分宜云

原跋

龍鐔字德剛萬載人年十九選入南宮曹國李文忠司
成宋訥遇以國士薦知高皇帝召對稱旨命同隨春
坊官入直講悉民間田里稼穡陳古今孝弟文學諸

史數年詔治水於泰州視軍遼東川雲所經利弊當
興革者悉以聞帝嘉其能特授浙江按察使歲浹饑
俸贖悉捐濟各郡以不避權貴為忌者所中遷長洲
知縣歸侍養歲餘適晉府恭王薨世子幼起為晉府
左長史北平師起傳檄徵晉府兵鐔泣固拒之文皇
引兵至城下力攻不克竟趨金陵入正大統械鐔下
錦衣獄不屈死焉年僅四十

人物志

黃伯奇分宜人姿性純篤好禮尚義洪武中以才行老

成舉授金華知府莅政嚴謹吏服其能

明一統志

嚴孟衡字衡中分宜人永樂進士授監察御史屢疏大
臣不法有司憚其風采陞浙江副使莅任前一夕胥
吏不戒於火案牘燬在事皆夤緣規避衡自引辜受
罰運磚逾年有白其枉者赦復職時法網稍密衡悉
心平反一牘中至理冤濫數十人屢遷至四川右布
政使凡三年卒於官

人物志

劉蓋字迪誠萬載人永樂進士授給事中詔巡撫湖廣

表循良黜貪墨綽有風采以論事忤旨調通州判官
尋復為給事中言愈切直謫嚴州府經歷卒

同上

易節字時中萬載人永樂進士授行人歷禮部員外郎
宣德間知成都府陞貴州左布政使有惠政夷人化
服卒於官

明一統志

郭瑾字邦器萬載人永樂進士歷刑科都給事中特進
刑部右侍郎以論中官忤旨出知潯州府未幾復原
官轉左侍郎懇辭歸卒年八十三

人物志

李瓊字蘊素萬載人宣德乙卯舉人仕高安縣訓導歷
詹事府校書進汀州知府首建學校決訟如神吏無
侵漁時上抗寇至躬詣撫降民安之同上

羅紳字尚訓宜春人宣德末年貢先任鹽亭知縣復任
廣東石康縣流賊陷城父子三人死節立忠孝祠同

上

袁魯訓字宗道宜春人唐碧池先生之裔成化進士授
東陽令蒲鞭不事又補蒙城擢行人司正時汪直輩

專橫魯訓雅志解組適同年羅一峯以論李賢見謫
遂嘆曰直道不容如此哉遂棄官歸慕五柳之風植
六柳以自娛號六柳居士

同上

袁慶祥宜春人以貢入太學待選吏部上疏言賞賜過
濫所出不償所入又論刑部尚書董方身不執法而
折辱屬官以自厲又言正本澄源宜從學校胄監親
民之職宜慎簡縣令黜衰老以息貪汙宜用夏塤張
元禎高明羅倫以從士望書奏詔杖之東華門

同上

按袁慶祥林志失載時雩都有同姓名者成化朝亦入太學上疏被杖別有傳

蕭義字宜之宜春人成化進士授吏部稽勲主事卒義操履端方問學典實文詞雅暢袁士多師之同上

按蕭義所著有葵菴集

歐陽汶字伯魯分宜人以經明行修舉授開封府學訓導改永康不受士贄師範嚴整進國子學錄嘗疏論時事遷周府長史改伊府致仕

林志

郭紳字廷章宜春人成化進士授寧海知縣侍講方孝孺縣人也事淹國禁紳至首刻方正學集創祠祀之擢監察御史歷官南京刑部右侍郎卒紳器宇凝重雖歷崇顯而居鄉待人寬厚簡樸有長者風子叙正德進士歷貴州叅議

人物志

高琬字德資宜春人成化進士歷知松陽上海二縣治行第一擢南御史歷官浙江布政使撫治鄖陽河南襄漢盜起琬同都御史彭澤討平之璽書獎勵謝病

歸卒年八十有五

安志

張鳳字應時宜春人成化進士授江浦知縣歷長樂內黃皆有政聲累陞廣西叅政時土酋為亂至則斬其渠魁撫循其衆地方以寧轉南京太僕少卿尋陞南京僉都御史提督操江改巡撫蘇松三河盜起齊魯騷繹河運不寧進右副都御史巡撫山東兼理河道

事平致仕卒於家

林志

龍士通字允升萬載舉人任長汀知縣長汀地饒而俗

黠士通冰檠自矢供具日止腐菜家僮三人見其清苦遂逸其二高御史封按閩風力嚴峻特薦之遷彰

德府同知

府志

李香字汝蘭分宜人正德進士初授工部主事抽分徐州轉刑部尋擢廣東兵備綏靖蠻寇歷陞四川巡撫大理正卿引疾致仕歸清恬端莊宦轍所經靡不服其公廉居家敦尚孝友捐橐贍族修葺學宮子慶餘亦篤孝友

人物志

彭鳳號夢瀑分宜人嘉靖進士選庶吉士授編修冊封岷藩却諸餽遺甲辰會試充同考官同里時相欲徇所私鳳峻拒不納撒棘後有撫拾科場之弊者波及鳳竟用罷歸家居寓情山水以著述為事敦行孝弟嘗引呂氏藍田約參酌成篇西岡彭氏家法遂冠一邑時相敗鳳冤始白所著有逸休堂稿

徐學詩逸休

堂稟序

易鸞字和鳴五歲能詩正德十五年奉文建黃太常忠

臣祠鸞願以已地立祠助修嘉靖癸未進士授和州知州下車手較權量使民畫一時有易公稱斗之號陞刑部郎子弘器嘉靖丙午鄉試第一家居清澹博古善文未仕卒

人物志

何儼字邦美宜春人嘉靖進士授舒城令擢兵部主事改御史巡按蘇松一意激揚微行出訪大吏憚其丰采入掌計典公平不阿林居十載執政復以書起辭曰吾守吾舊不能降心以從人也郡中有大利病侃

侃陳說里人德之

府志

楊以誠字明夫宜春人嘉靖進士授行人擢御史巡陝西茶馬嚴絕吏弊復巡按廣東彈劾不職賊吏望風解綬者十餘人以遭謗歸里

同上

朱良佐字守忠萬載人嘉靖進士授淮安推官擢兵科歷戶科都給事彈壓不避權貴如正中宮通海運肅閹監停翫作載大政記中陞大理右少卿謝病歸人

物志

宋希堯字叔中分宜人萬厯進士時江陵不丁母憂鄒元標以進士特疏叅劾希堯亦侃侃持論其子宜奔喪故為所忌授刑部未幾稱病歸越歲出補工部營繕司卒

同上

簡繼芳號慶源萍鄉人負資異敏年十三與童子試邑令楊自治見而奇之稱為崑山片玉遂補諸生家貧篤學萬厯進士歷官雲南副使所至稱廉謹以老告

歸

府志

陳吳言字汝說宜春舉人教諭宜興陞上杭知縣清敕
端重不阿當路轉維摩知州告養生平孝友廉靜寡

慾學以性命為宗

同上

張璧字世良萬載人萬厯進士授南兵部主事歷武庫
司郎中值營兵缺餉脫巾譟呼璧單騎擒首亂卒以
鎮定遷廣西僉事巡左江却關門例數千金定交南
黎莫二氏構殺之亂轉右江叅議改雲南叅議分守
金滄條議罷大理採石省麗江額解金值歲饑斗米

錢三百臺司議以米代杖每就禁多斃壁歎曰吾寧
違新法以一官易多命下令悉除之全活三百餘人

嗣謝病歸

人物志

趙錦分宜人安貧嗜學嫻於詩賦著有草堂集行世子
濂弱冠選貢授石埭令累遷惠州郡丞所至有善政
事親以孝聞撫姪如子好引進後學邑人稱為東谷
先生年九十五卒

同上

羅彝號性菴萍鄉人父喪廬墓三年註孝經萬厯初詣

京上書給賜深衣大帶與鄒南臯劉瀘瀟闡明理學

江右皆仰宗焉

同上

彭士遠字利見分宜人萬厯舉人初授廣西賓州知州
移河池州州素患土孽士遠廉得其渠魁地方寧謐

尋遷鳳陽同知以河功加俸

府志

彭自新字滌之萬載人萬厯進士授行人陞刑部郎中
出守四川重慶府陞本省副使歷陞雲南叅政時雲
龍逆酋段進忠謀襲奪官擁兵叛自新計誘擒勦殲

渠散脅迤西以平遷本省按察使以疾致仕歸自新
初為大行即抗疏請元子冠婚大典一時重其丰采
人物志

朱志字元遠宜春人少負才名以貢選入太學舉順天
辛卯鄉試任瀏陽令子壻來省一飯即令歸甫三月
以不阿鑛璫棄官歸子六人俱以文學顯光裕光祺
先後鄉薦光祺字資賢端謹嚴重遭郡多故祺條議
戰守激揚忠義上書得督語極憤切後教授萬山中

疾革正襟而卒

同上

宋九儀字夔卿萬載人由恩選授建寧知縣尚文學課
農桑禁女巫戒溺女廣倉儲歲凶捐俸積穀邑人曰
宋公倉士民愛慕為立生祠九儀取其本主以歸曰
吾不務虛名也入覲力請終養事親以孝聞林居三
十餘年吟咏自娛有和淵明六詠以見志年八十一

終

同上

袁軾字欽禮宜春人年十四失父下帷力學補博士弟

子試輒高等入闈不遇毅然曰泉石可甘菽笋可嗜
奚區區為日課子以程朱之學與里中講鄉約訓民
行學者稱為東泉先生年七十有二以子業泗貴贈

漳州府知府

同上

嚴堯日號用汲分宜舉人任泰和學博文水鄒元標倡
會講學獨折節於嚴鄒起總憲招為幕屬力辭復署
汾西卒孫一晁順治辛卯鄉薦

府志

袁業泗字景源軾子萬厯進士知樂清縣改蘭谿丁父

憂再補龍溪所至著循良績擢南京兵部主事進員
外郎中特疏請撤湖口稅璫李道遂罷其推江上下
千里稱便知漳州府漳故多盜業泗梳櫛綢繆俾無
震擾士民親附歲饑發倉賑之又勸民出粟分遣諸
吏乞糴潮陽諸隣郡以濟不給全活數千人陞福建
副使念母年八十餘乞養家居崇禎改元召補廣西
副使分守左江遷廣東叅政分守嶺東平九連山賊
地介惠潮兩郡多反側肇置連平州所部以寧徵為

南京鴻臚寺卿再疏乞骸歸以疾卒子繼梓康熙甲

辰進士

人物志

吳三益號受元萍鄉人萬厯進士授大理評事由寺正
出守邵武尋改徽州所至以敏練著聲晚年林居與

修郡乘

府志

張承詔號篤斐分宜人萬厯進士授蘇州推官遷禮部
主事擢戶科轉工科都給事中果決敢言歷陞南刑
部左右侍郎署尚書以會審事忤旨聞住

同上

彭大科號魏名分宜人萬厯丁酉舉人初知漢川縣縣
有河名劉家隔者巨鎮也商賈絡繹歲額派商稅八
百金協濟潞府癸丑河閘舟楫不通而稅仍歲徵隔
民苦之大科力為陳請得罷其稅撫按交薦調知廬
江有惠政陞北城兵馬司時逆璫魏忠賢用事大科
獨守正不阿左遷景東同知璫敗擢工部主事監督
陵工以病請告

人物志

嚴雲京號志印分宜人萬厯乙卯鄉薦知平原縣以城

守著績陞兵馬指揮召對授御史巡按河南兼監軍
時汴圍越月京疾趨受事促諸鎮左良玉劉澤清許
定國等進兵援汴圍稍解未幾賊復合值霖雨彌月
平地成川賊決河灌城城沒而汴圍獲解會上別遣
監軍來代乃歸

府志

袁一鳳號鳴岐宜春人萬厯進士初任工部主事陞虞
衡員外郎中曉暢吏事善治繁劇逆璫廉其能有意
鉤致之一鳳持不為動守西安清介自持未幾遷浙

江副使時海塘崩潰奉旨估費十五萬金一鳳身任其役用四萬金而工成歷楚藩臬卒於官

人物志

鍾玠字叔憲分宜人天啓進士授中書歷禮科都給事中鎮密不妄言嘗以素賦浮重又遼餉加派煩多約諸紳在朝者疏請豁減卒以部議格未盡行識者恨焉累官左都御史以會審事秉筆忤旨革職回籍林居十餘年卒

府志

黃希憲原名金貴字雙南分宜人天啓進士知順德縣

擢御史巡按甘肅遷太僕少卿應天巡撫三吳漕白
二糧累民已久希憲力為請命海寇王尚忠蹂躪崇
明各村落希憲殲渠散脅吳松悉平晉秩河道總督
兼兵工二部侍郎乙酉江左姦黨誣以河工冒餉下
詔獄會喪亂出亡遇盜殺於江上

人物志

喻子賢萬載人由舉人令廣東程鄉調增城下車數問
疾苦民情悉達遇事迎办立解輯蠹役無敢奸法催
科革加耗俾自註簿民樂輸焉寇盜扳良多置不問

諸自經服毒誣人者懲之風俗為之一變至於笞郡胥之害民抑中使之橫恣尤人所難以艱去民如失

襁褓

廣東名宦志

袁一鰲字占梅宜春人由舉人授江山知縣調邵陽入為南大理評事陞刑部員外審決河南擢寶慶守吏民畏服喜獎拔士類以忤岷藩解綬歸卒

府志

朱允恭字君培分宜人由鄉舉授望江知縣臺司交薦以循良高等遷守海州焦勞拮据雕殘稍有起色忤

當事去任允恭早失父而貧事母純孝撫弟至老不衰凡所入不以自私遇歲奇荒雖日不再食猶簡敝衣鬻於市以周親族之貧其好義如此

人物志

按府志載有郭彥恕者事繼母以孝聞隣人鬻妻贍母貸以貲完其夫婦不詳何縣人安志孝義傳有萬載郭擦龍以仁張經宜春易直萍鄉李魁春李茂林俱附錄於此

潘士聞宜春人進士天啟二年知清豐縣釐革弊政羣

吏肅然操持廉潔纖芥無取捐俸百餘金置田歲徵
租貯之學舍以賑貧寒擢刑科給事中

直隸名宦志

袁繼咸字臨侯宜春人天啓進士授行人擢御史歷山
西提學僉事湖廣叅議賊首呂瘦子作亂討平之驅
逐黃州賊老回回革裏眼等七大部與黃岡知縣徐
調元築城六千餘丈一月而竣廷推右僉都御史撫
治鄖陽以襄陽失陷被逮遣戍已而廷臣交薦起故
官總理河北屯政未赴會賊逼江西廷議設重臣總

督江西湖廣應天安慶軍務乃命繼咸兵部右侍郎
兼右僉都御史以行時賊已陷武昌左良玉擁兵東
下人情洶洶繼咸遇之於蕪湖激以忠義良玉還復
武昌而朝議忽以呂大器來代命繼咸仍督屯政大
器與良玉不相能長沙袁州俱陷疆事益迫廷議復
推繼咸代之甫抵鎮京師陷福王立南京繼咸入朝
密奏曰左良玉雖無異圖然所部多降將羣心危疑
臣當星馳回鎮臨行復陳致治守邦大計引宋高宗

用黃潛善汪伯彥事時相馬士英以為譏已也凡所
陳奏及題用文武官悉被停寢羣小皆謂繼咸與良
玉倡和脅制朝廷適留都有偽太子下獄之案良玉
疏爭不納繼咸疏言太子真偽非臣所能懸揣真則
望行良玉言偽則不妨從容審處多召東宮舊臣辨
識以解中外之疑疏未達而良玉反且將馳檄以清
君側為名矣初繼咸聞李自成兵敗南奔恐其由岳
州犯長沙入江西境命部將郝效忠等守九江而自

統副將援袁州已登舟忽聞良玉反復旋九江良玉
舟抵北岸貽書言願握手一別九江士民泣請繼咸
往紓一方難遂與監紀余有灝會良玉於舟中良玉
言及太子下獄事大哭次日移舟南岸良玉袖出皇
太子密諭劫諸將盟繼咸正色詰以密諭從何來良
玉語塞約不入城且改檄為疏駐軍候旨繼咸歸集
諸將城樓灑淚曰兵諫非正晉陽之甲春秋所惡可
與同亂乎方計拒守而效忠顧與良玉合兵劫掠城

中婦女財物繼咸出城面責良玉良玉疾已篤望見
城中火光大哭曰予負素公嘔血數升是夜死其子
夢庚秘不發喪諸將推為帥急移舟東將及湖口夢
庚效忠納款執繼咸北上丙戌三月死

白志

梁佳植宜春人崇禎舉人令餘姚體緩而口緘默及鞫
訟則屹然不可移錢穀久為吏胥乾沒佳植至一洗

積弊民樂輸恐後

浙江名宦志

張兆蘭字以綺分宜人性豪逸強記能文崇禎辛巳選

貢廷試唱名禮部諸生皆踞伏兆蘭獨長揖宗伯奇之癸未冬憤獻賊陷袁偽署官屬糾衆謀殺偽知縣龍方捷恢復邑城事覺為所執死萬年橋上人物志

張自新分宜人崇禎間任京山縣尉有賊盤踞羅漢嶺自新統民兵往勦衆寡不敵竟為賊傷死之

湖廣名

宦志

劉映洙字崑懸宜春人才氣豪宕崇禎壬午舉春秋鄉試第一後棄家學浮屠誅茅劉醴深山以終

白志

國朝

張問明字曰章分宜人以明經任魏縣值寇抄掠城下
單騎撫諭以治河著功督撫嘉其能署永平軍戊
寅己卯間大水丁亥竒荒煮粥施米全活甚衆司理
王延禔題其廬曰德門遺老云

人物志

按張問明丁亥施賑前志入明末今改正

陳之龍號去亢宜春人天啓鄉舉明敏英達有文武才
任常德推官陞乾州知州西安同知入

本朝歷任巡撫廬鳳淮揚後以疾歸

白志

張自烈字爾公宜春人博物洽聞著有四書大全辨諸家辨古今文辨正字通十餘種行世累徵不就晚卜

居廬山年七十七卒無嗣南康太守廖文英重其品
葬於白鹿洞山外之鄭家冲書其碑曰清故處士張

芑山墓

安志

楊嘉禎宜春人郡庠生順治丙戌春父文盛避兵山堂
兵將至嘉禎從間道渡水報父水急被溺流至深處

猶躍出水面曰速走速走遂溺死

白志

江西通志卷七十二

欽定四庫全書

江西通志卷七十三

人物八

臨江府

漢

孔恂字巨卿新淦人為州別駕車制舊有屏星如刺史
車式刺史行部發傳晏移怒欲撤別駕屏星恂曰使
君傳自晚發欲撤屏星毀國舊制別駕可去屏星不

可撤即投傳去刺史追謝乃止

林志

晉

留京臨江郡人孝行推於鄉里時江水暴漲居民皆漂

溺京負其母號泣忽有大龜至其前舉家七口俱上

龜背行十許里及一高岸遂失龜

豫章書引九江記

按晉時未有臨江郡名留京事林志不載

唐

魯季文清江人貞元間廬父母墓江水遠不可汲忽一

虎於廬側跑地得泉人以為孝感名其坊曰虎泉今

為孝感坊云

林志

楊彥伯字鼎臣新淦人大順間擢童子科昭宗親試之
彥伯應對詳雅上曰劉晏之徒也以詩賜之後為安
福令州以異狀聞賜緋魚歷官門下侍郎

同上

南唐

鄧佑弟佖新淦人佑擢南唐童子科佖登三禮科鄉人

易其鄉曰揚名里曰雙秀

林志

宋

曾文照新淦人七歲應南唐童子科擢第三李氏歸宋
為亳州永城令上疏論邑利害免挽船夫力歲以萬
計遷蒙城蝗不入境終大理司直

白志

按曾文照林志重見吉安人物作文昭白志刪彼
存此列入南唐今改入宋照與昭未詳孰是

孫冕新淦人雍熙進士天禧末守蘇州王欽若出鎮餘
杭素與冕友檣舟吳門佯醉謂冕曰兄淹遲日久當

別置委曲晁正色拒之欽若愧謝後謝郡歸九華山

召竟不起

林志

曾乾度字順承文照子淳化進士兩任推官三典州縣

未艾乞祠起知筠州竟謝事歸

同上

按舊志有王欽若何正臣傳欽若歷相兩朝無可紀之蹟正臣因蔡確薦為御史傾陷蘇軾俱有玷人物今削

蕭律字調元新喻人景德二年賜明法及第為廣州司

法民有犯銅論及流死者百餘人律以狀聞罪止於
杖守汀州以屬邑上杭多嵐瘴奏遷縣治於平曠之
地仕者免客死徙潤州以江道紆回風濤為患開直
道通舟歲省淘河工五萬墾書褒諭累官金部員外

郎

同上

蕭諤新喻人以詩易二經教授鄉里尤篤於訓子其後

四子博學有名皆登第

同上

丁雋字德偉新喻人通春秋時號丁三傳事親至孝篤

宗族五世聚居踰二百口均愛如一大中祥符間旌

其門

同上

宋玘字子美新淦人鄉貢至京夜夢一僧語曰公才高
當擢第惜壽不永若速還可延翌日即南歸不復進
取人推為鄉先生三孔皆出其門與王介甫唱和名

見臨川集

同上

劉立之字斯立式子大中祥符進士為連江尉累官湖
北路轉運使坐事免起漣水軍會西南蠻獠叛諸路

請益兵上問立之因備言可蓄不可捕狀卒如其議

尋遷益州路轉運使子敞為時名臣

同上

蕭賀字慶之諤長子咸平進士屢官御史負直聲臺有
檇木或曰檇凡材宜易柏賀曰道有不直官惟其人

作宥檇賦終職方員外

人物志

蕭貫字貫之諤仲子與弟賁同登大中祥符第仁宗初
官太常丞出知洪饒二州時有撫州叅軍孫齊者出
其妻杜氏娶周氏入蜀復納娼陳氏并挈周所生子

之官未幾周亦至齊怒手及其子周訴州及轉運皆
不受理或告之曰訴洪州蕭使君白矣周乃馳告撫
非貫所部特檄治之雖更赦猶論齊編管遷兵部員
外郎召試知制誥卒有文集二十卷

林志

楊申字宣卿新喻人天聖進士乙科上饒丞入為太常
少卿遷光祿卿正色立朝與王安石論新法不合出
知濟州多善政監司皆新進申以舊人崎嶇不樂仕
遂乞歸呂大防表所居為耆德坊

同上

陸起新淦人慶厯進士為英州真陽令有巫以銀瓮貯
二蛇自嶺北至真陽誘民迎且祠焉觀者填路起聞
驟至蛇所亟令出瓮斬之捕巫劾其姦遠近稱為神
明仕至員外郎人物志

劉敞字逢父臨江人舉進士甲科通判蔡州召試還直
集賢院判尚書考功仁宗賜夏竦謚曰文正敞言竦
之行邪而謚之以正不應法疏三上仁宗為更竦謚
同修起居注尋遷右正言知制誥奉使契丹素知山

川道里遼人歎其博物使還求知揚州徙鄆州糾察
在京刑獄嘉祐四年祫享羣臣上尊號敞言非古仁
宗然之請外知永興軍召還翰林治平中判太常丞
改集賢院學士判西京留司御史臺卒年五十敞為
人明白俊偉博學自信自六經諸子百氏下至傳記
小說無所不通為文敏贍在西掖時一日追封皇子
公主九人敞將下直為之立馬却坐一揮九制文詞
典雅各得其體在長安得先秦古器數十愛其款識

文字奇古因以考知三代制度與先儒所說不同者
所著春秋傳權衡說创意林總四十卷文集六十卷
弟子記五卷七經小傳五卷弟攸子奉世

東都事畧

按歐陽公所撰墓志以敞為吉州臨江人宋史以
為袁州臨江人考臨江軍建於宋淳化三年領清
江新喻新淦三縣袁宇記所未及載此時新喻尚
隸袁州新淦尚隸吉州其後乃分二州之地置臨
江軍故袁吉得並稱臨江也又按敞所著名公是

先生集 原跋

劉攽字貢父與兄敞同學遂偕中進士調江陰簿為國
子監直講趙槩薦攽可備文館召試優等熙寧初知
太常禮院神宗手詔推求太祖諸孫屬行尊者為王
以奉太祖後攽曰禮諸侯不得祖天子太祖傳天下
於太宗繼體之君皆太祖子孫不當別為太祖置後
臣以為太祖子唯德昭德芳二人宜從其後世世勿
降爵宗廟祭祀使之在位則陛下褒揚藝祖休顯著

明矣考試開封府進士程文有用小畜字者王介謂
犯仁宗嫌名攷曰此六畜之畜亦嫌名也因紛爭御
史劾之遂出通判泰州代還為集賢校理判登聞鼓
院三司戶部判官知曹州曹素多盜朝廷立重法而
盜不息攷曰民不畏死柰何以死懼之至則尚寬平
務在不撓視官屬如子姪歲中盜賊衰息召為開封
府判官元豐初出為京東轉運使罷知兗州徙亳州
元祐初召為祕書少監以疾求補外召拜中書舍人

卒年六十七所著文集暨五代春秋內傳國語經史
新義東漢刊誤詩話錄芍藥譜漢官儀凡百卷

同上

按攷所著名公非先生集

蕭映字仲景新喻人天聖進士筮仕吉水威惠並行邑
大治每歲輸詣郡皆汭流而上映請築倉近郭以便
輸將後知道州終屯田郎中

林志

蕭固字幹臣新喻人天聖進士授太常博士通判虔州
諸邑剽劫固授成美不踰月誅縛殆盡璽書獎諭改

知桂州兼廣西轉運使時儂智高侵邕州廷議皆欲
進討固知智高凶狡預陳羈縻之策於樞府不果用
後智高果叛人服其識交州貢麒麟固力諫却之累
官集賢殿修撰

人物志

歐陽賓字國華新喻人五經出身宜黃尉時盜夜殺人
舟中無所掠而去賓疑之呼死者妻詰之色動乃姦
夫也捕寘於法再遷虔州左司理多所平反四遷為
比部員外郎通判饒州

林志

孔延之字長源新淦人孔子四十六世孫慶厯進士九
遷至司封郎中平生與周敦頤友善在廣西寬恤民
力舊賦糴於民歲至六百萬石程督與租稅等延之
計歲糴二十萬而足欽廉雷三州蠻戶為富人所役
延之奪使自為業者六百家皆著定令改荊湖北路
提點刑獄罷鼎州六寨戍兵千餘人諸子並以文章

顯世號臨江三孔

人物志

胡向清江人皇祐進士自袁州司理歷審刑院詳議權

大理卿決獄仁恕所至無冤嘗倅越州奏課為天下

第一 同上

陳公琰字易卿新淦人皇祐初擢第知醴陵縣時朝廷
變鹽法吏緣為姦上疏蠲除之八遷至諫議大夫七

十致仕 同上

傅燮字志康清江人嘉祐進士熙寧中由幕府累遷少
府少監專劇郡所至有聲尤博學藏書萬卷皆手自
校勘年八十好學不衰 林志

蕭注字巖夫新喻人由進士攝番禺令儂智高圍廣州
注突圍出募壯士得二千人連舶乘風縱火焚賊舟
破之智高走大理擒其母與二弟募敢死士入大理
智高已死函首歸獻擢禮賓副使廣南駐舶都監知
邕州尋貶鎮南節度副使會有訟注功者起右監門
將軍邠州都監熙寧初交人挫於占城衆不滿萬時
謂可取以注知桂州將圖招徠之策會遣沈起代之
罷歸卒於道

同上

孔文仲字經父臨江軍新淦人也少刻苦問學號博洽
舉進士又舉賢良方正召試對策極論新法之害不
為王安石所喜黜不用哲宗即位為校書郎遷禮部
員外郎有建議皇族惟楊王荆王得稱皇叔餘疏屬
當各係其祖若唐人稱諸王孫之比文仲曰上新即
位宜廣敦睦之義不當疎間骨肉議遂寢擢起居舍
人拜左諫議大夫論青苗免役之法為首因天下論
保甲保馬茶鹽之法為遺螫留蠹遷中書舍人卒年

五十文仲學識高遠天資獨介寡言笑少所合有文

集五十卷弟武仲平仲

東都事畧

謝舉廉字民師新喻人少與弟世充從父懋叔岐同學

元豐八年叔姪兄弟連第時號四謝以擬三孔舉廉

宰南康有善政尤工於詩所著有藍溪集

林志

李諂字仲詢臨江軍新喻人幼時父出其母日夕泣涕

求母還至絕葷茹鄉里稱孝舉進士累擢知制誥權

三司使建言天下賦入有常而用度日滋願一切裁

抑之又以商人入粟邊郡美茶與犀象為虛實三估
坐耗官帑請以實錢參紐由是怨謗滋起出知洪州
徙永興軍累官知樞密院時權茶法寢壞復用諮法
而官無濫費諮性明達周知世務在樞府號為稱職
卒贈右僕射謚憲成

東都事畧

李巖臨江人元祐二年知東莞縣以能名邑東瀕江田
每罹夏潦之害巖於西湖福隆右貝司馬頭巾山牛
渡海諸處築長堤捍之民獲其利明年復築鹹潮堤

十有二延袤一萬六千八十丈田二萬千餘頃至今

賴之

廣東名宦志

蕭從字從義新喻人元豐進士分宜令遷宗學博士權御史臺主簿蔡京欲處以六察使排異己者從謝不能乞郡除河南少尹擢陝西運判卒

林志

劉奉世字仲馮元祐初擢起居郎詔冊乾順為夏國主以奉世使西夏遷天章閣待制樞密都承旨除吏部侍郎權戶部尚書以樞密直學士僉書樞密院事罷

為端明殿學士知成德軍坐元祐籍責光祿少卿再
貶隰州團練副使郴州安置後移居道州徙光州復
端明殿學士知定州又知鄭州以言者落職提舉崇
福宮以舊職致仕

東都事畧

孔武仲字常父舉進士為禮部第一元祐初為祕書省
正字遷著作郎論科舉之弊詆三經新義請復詩賦
取士遷國子司業侍講邇英數月拜中書舍人直學
士院時議祠北郊久不決武仲請用純陰之月親祠

如神州地祇遷禮部侍郎出知洪州移宣州坐元祐黨奪職居池州卒所著詩書論語說金革講義内外

制雜文共百餘卷

同上

孔平仲字毅父舉進士元祐中入館選即出為京西路提點刑獄坐黨籍謫知韶州又責惠州別駕英州安置徙單州團練副使饒州居住徽宗即位召還為戶部員外郎遷金部郎中出使陝西帥鄜延環慶奉祠而卒平仲有史學著續世說行於世

同上

胡靜字應侯向之子磊落有大志讀兵書應武舉試秘閣為第一從西師入夏界修羅九城破賊於賞逋嶺勇冠三軍以功加閣門祇候累遷秦州東路蕃漢巡

檢林志

陳竑字君度新淦人元祐進士鎮安軍節度使推官郡頻年患水因條陳全城隄決溝澮等事會詔釐正祀典竑悉毀淫祠又常率同僚瘞枯骨之無歸以籍沒產給寓喪於佛祠者兄弟三人以父蔭敘相遜自取

科第終以直氣不撓罷

人物志

郭奉世字少馮新淦人元祐進士羅田令改知永新有
異政泰和民素苦令詣漕司乞更奉世永新之民遮
留不可乃寓兩界兼理之山東盜起擢知密州破巨
盜張海等數萬五遷至徽猷閣待制移守襲慶金兵
再至有旨以徐兗兵赴闕和議成退保宿毫移軍於
濟謝事歸里

林志

李大有字仲謙新喻人紹聖進士累擢中書門下省檢

校公事權給事中守虔州宣和末金人侵京詔諸道勤王大有募義勇五千人入援後守三衢有寇猖獗

下車即平

同上

謝磐字安國累舉廷對高宗作損齋磐言未能損者八有司以言訐置第二時稱八損狀元

人物志

李邈字彥思臨江軍清江人以父任為太廟齋郎用薦擢提轄環慶路糧草通判河間府以忤蔡京童貫換右列為遼國賀正副使還以上書言契丹不可減免

官久之進都大提舉京西汴河隄岸改知嚴州代還
貫欲以西師入燕邈復語貫曰方臘小醜一呼屠七
州四十餘縣竭數路之力而後能平之殆天以此警
公也何可遽移之北乎因密教貫陰佐契丹以圖金
人貫不能用乃乞致仕貫收復燕山奏邈知涿州改
易州皆辭不赴嘆曰禍自茲始矣金人侵京師詔趣
入見既至上言种師道宿將有重名二敵所畏朝廷
自主和議而盡以諸道兵畀師道視敵為進退將在

軍中君命有所不受使見可擊而進勝固社稷之福
不勝亦足使敵知吾將帥有以國為任者上稱善而
耿南仲方主和議不合乃以邈為京城西壁守禦使
邈言姚平仲敗績而敵猶不敢留是畏我也不以种
師道再戰已失機會尚可尾其行及河半渡擊之猶
足為後戒議復格三上章致仕不允權樞密副都承
旨出為河北西路制置使守真定拜青州觀察使仍
知府事金人至邈乞師於宣撫副使劉韜且間道走

蠟書上聞皆不報城被圍且戰且守相持四旬城破
邈巷戰不克將赴井左右持之不得入斡里雅布火燎
其鬚眉及兩髀亦不顧乃拘於燕山府金人命邈被
髮左衽邈憤詆毀甚力金人搯其口猶吮血喫之翼
日自去髮為浮屠遂遇害將死顏色不變南向再拜
端坐就戮贈招化軍節使謚曰忠壯

宋史

胡洵直字次魚新喻人宣和間以貢入京著中興策二
十五篇後舉進士累官湖南提刑司幹官深於詩凡

子史靡不涉獵有蘭谷集十卷

林志

蕭建功字懋德新淦人嘗從陳了翁瓘遊瓘器重之時李朴謫歸貧不能自給建功為築室居之朴死以女妻其子義聲日著李綱薦其操行累官知衡州刻思賢堂法帖三十卷

人物志

按宋時未有峽江縣人物志以建功為峽江人訛白志據林志改正

向子諲字伯恭臨江人欽聖皇后從姪也補承奉郎宣

和初除江淮發運主管文字有欲濬河與江淮平者
子諲言河高江淮數丈而欲濬之使平決不可曩有
司三日一啓閘復作堰儲水故水不乏比年行直達
之法啓閉無節堰閘率不存今復故制嚴禁約則無
患使者用其言漕復通進秩一等為京畿轉運副使
尋兼發運副使金人犯亳州子諲以書遺金人言兵
勢逆順令退保河外金人遽以亳宋等州守禦所牒
報之約日索戰諸道兵畏縮不進時康王次濟州子

諲遣進士李植獻金帛及本司錢穀之在濟州者以助軍費張邦昌僭位使其甥劉達賁手書來子諲不啓封焚之械繫達於獄遷直龍圖閣江淮發運副使以素為李綱所善故黃潛善斥之起復知潭州金人破江西移兵湖南子諲聞警報率軍民死守金人圍八日登城縱火子諲率官吏奪南楚門遁坐敵至失守落職賈収言子諲督兵巷戰又収潰卒復入治事帝亦以子諲與他守臣望風遁者殊科詔復職移鄂

州主管荆湖東路安撫司劇盜曹成據攸縣子諲軍
於安仁單騎入賊中諭以國家威靈成不服執子諲
歸會馬廣遣人持吳敏檄諭成成許受招始釋子諲
詔提舉江州太平觀起知廣州尋移江州改江東轉
運使徙兩浙路都轉運使除戶部侍郎以徽猷閣直
學士知平江府金使議和將入境子諲不肯拜金詔
上章言自古人主屈己和戎未聞甚於此時宜却勿
受忤秦檜意乃致仕退閒十五年號所居曰薌林卒

年六十八 宋史

胡聖隆字藏之於書無不讀恥為王氏學不事舉業自號瀟灘居士賢士大夫樂與遊政和初以白衣上封事召未及對而卒

林志

蕭燧字照鄰臨江軍人紹興進士授平江府觀察推官時秦檜當國其親黨密告燧秋試必主文漕臺燧詰其故曰丞相有子就舉欲以屬公燧怒曰初仕敢欺心耶檜懷之調靜江府察推而歸孝宗初除諸王宮

教授累遷至國子司業進起居郎先是察官闕朝論
多屬燧以未歷郡縣遂出知嚴州嚴地狹財匱始至
官錙不滿二千燧儉以足用二年之間積至十五萬
以其美補積逋諸色皆寬移知婺州父老遮道幾不
得行婺與嚴隣人熟知條教不勞而治除吏部右選
侍郎旋兼國子祭酒除權刑部尚書充金使館伴十
年兼權吏部尚書高宗山陵充按行使除叅知政事
尋充永思陵禮儀使權知樞密院以年及自陳除資

政殿學士提舉洞霄宮卒年七十七謚正肅子達淳

熙進士唱名第四累官至太常

宋史

向渢字子源子諲仲子常從胡五峯遊端重有父風倅

邵陽未幾即挂冠歸

林志

按向渢人物志作悟

謝諤字昌國臨江軍新喻人紹興進士調夷陵縣主簿
未上撫之樂安多盜監司檄諤攝尉條二十策大要
使其徒相糾而以信賞隨之羣盜果解散金渝盟諸

軍往來境上選行縣事有治聲改吉州錄事叅軍歲
大侵饑民萬餘求廩官吏罔措諤植五色旗分部給
糴頃刻而定知袁州分宜縣縣積負於郡數十萬歲
常賦外又征緡錢二萬餘諤乃疏其弊於諸監司請
免之以憂去服闋除幹辦行在諸司糧料院尋擢監
察御史奏減袁州分宜秀州華亭月椿錢諤里居時
創義役法編為一書至是上之詔行其法於諸路民
以為便光宗登極獻十箴又論二節三近所當節者

曰宴飲曰妄費所當近者曰執政大臣曰舊學名儒
曰經筵列職除御史中丞權工部尚書請祠以煥章
閣直學士提舉太平興國宮而歸卒年七十四贈通
議大夫諤為文倣歐陽修曾鞏初居縣南之竹坡名
其燕坐曰艮齋人稱艮齋先生

宋史

按謝諤所著有聖學淵源錄五卷孝史五十卷艮
齋集十卷經解二十卷講義三卷諫垣奏議五卷
羅裳新喻人母病篤裳私誓剔肝以救母及刺入胸腹

輒推鋒取爐灰傳之血立止復籲天曰如母疾不愈
當易及既而母病少差後竟平復陳秉聞而賢之為

作里孝傳

林志

按新喻有歐陽環者閩郡稱孝大觀三年進士林
志不載附錄於此

張仲友世家新淦元祐末父早喪事母至孝人呼為張

孝子鄉先生宋玘為作傳劉次莊書於戲魚堂

同上

歐陽元量字宏中新喻人少有遠志與弟昌邦入青原

山著決勝兵要經進於上時傅雱通信兩宮奏元量
與俱假從事郎以行使還自寧鄉令轉陽山紹興間
有盜結徭獠為暴元量率三鄉民兵屯富連巖佛寺
盜夜劫寺與戰不利被殺

人物志

歐陽邦昌字德升靖康間在太學張邦昌僭號或勸避
諱邦昌曰吾知有國諱耳遂辭歸後以恩科終永淳

令

同上

孔括字端中新淦人父叔三人曰源曰淑曰滋相繼登

第鄉里亦號三孔括乃淑之子嘗令淳安廉介市號
美醞曰淳安清時以此况之名聞行在所高宗題殿
柱曰吏師孔括歲滿百姓留之上諭宰相曰可轉一
官令再任終濠州守

同上

劉龜年字且老新喻人放曾孫蔭從仕郎峽州司戶叅
軍改錢塘簿累遷道州軍事判官守李南壽言於後
守曰判官賢不求人知恐君或失之也改宣教郎通
判沅州蠻人侵掠無寧歲龜年按法立約恩信不爽

遂帖服後乞祠階以歸

同上

董良史字邦直新淦人紹興二年鄉薦第一判洪州時
江西運判張常先嘗憾帥臣張安道陷諸遷客冀得
良史證其事持不可移倅鄱陽秦檜當國任常先為
鷹犬莫敢有忤其意者良史卒不阿論者偉之

同上

鄒惇禮字和仲新淦人紹興二年中湖南北第一授宜
春法曹開軒種竹以自娛善書得顏柳法人皆寶藏
之所著有北窗集

同上

李維芑字仲彰清江人紹興中知新城縣以愛民為本
民之利病纖悉洞究省徭役興學校以儒術飭吏事

民立祠祀之

明一統志

劉清之字子澄臨江人受業於兄靖之紹興進士調萬
安縣丞時江右大侵郡檄視旱徒步阡陌親與民接
凡所蠲除具得其實州議減常平米直清之曰此惠
不過三十里內耳外鄉遠民勢豈能來老幼疾患之
人必有餒死者乃請均境內之地為八俾有粟者分

賑其鄉官為之主規畫防閑民甚賴之詣吏部銓知
宜黃縣丞相周必大薦之召對首論民困兵驕大臣
退托小臣苟媮又言用人四事一曰辨賢否二曰正
名實三曰使材能四曰聽換授改太常寺主簿通判
鄂州改衡州先是郡飾厨傳以事常平刑獄二使者
月一會集互致折餽清之歎曰此何時也與其取諸
民孰若裁諸公吾之所以事上官者豈以酒食財貨
為勤哉至之日兵無糧官無俸上供送使無可備已

而郡計漸裕民力稍蘇嘗作諭民書一編詞意質直
簡而易從念士風未振每因月講復具酒肴以燕諸
生相與輸情論學來者日衆增築臨蒸精舍居之作
朱陵道院祠張九齡韓愈寇準周敦頤胡安國於左
祠晉死節太守劉翼宋死節內史王應之於右部使
者以清之不能媚已誣以勞民用財論罷歸築槐陰
精舍以處來學者光宗即位起知袁州而清之疾作
猶貽書執政論國事周必大來視疾謂曰子澄其澄

慮清之氣息已微云無慮可澄遂卒初清之既舉進士欲應博學宏詞科及見朱熹盡取所習焚之慨然志於義理之學所著有曾子內外雜篇訓蒙新書外書戒子通錄墨莊總錄祭儀時令書續說苑文集農書

宋史

按史傳清之字子澄又朱子集中與子澄往還尺牘唱和詩篇甚多林志不加詳考訛以為字子儀原跋

章穎字茂獻臨江軍人以兼經中鄉薦孝宗嗣服穎為
萬言書附驛以聞禮部奏名第一調道州教授作周
敦頤祠會宜章寇亂郡僚相繼引去穎獨留寇平郡
守奏穎有協贊之功召對除太學錄初任郎召對者
自穎始遷太常博士光宗初遷左司諫屢疏請上問
安重華宮寧宗即位除侍御史尋權兵部侍郎韓侂
冑用事穎侍經幃上曰諫官有言及趙汝愚者卿等
謂何同列謾無可否穎奏言天地變遷人情危疑加

以敵人嫚侮國勢未安未可容易進退大臣願降詔
宣諭汝愚無聽其去不報羣御史劾頴阿私罷太學
生周端朝等六人伏闕辨汝愚被誣且謂章頴言發
於忠端朝等皆被罪自是羣論遂起矣侂冑誅除集
英殿修撰遷刑部侍郎尋陞禮部尚書丐去奉祠卒
年七十八贈光祿大夫謚文肅

宋史

彭龜年字子壽臨江軍清江人七歲而孤及長得程氏
易讀之至忘寢食乾道進士授棗州宜春尉吉州安

福丞除太學博士遷國子監丞改司農寺丞進祕書
郎兼嘉王府直講光宗嘗親郊值暴風雨感疾久之
疾平猶疑畏不朝重華宮龜年以書譙趙汝愚且上
疏言壽皇之事高宗脩極子道此陛下所親覩也况
壽皇今日止有陛下一人聖心拳拳不言可知特遇
過宮日分陛下或遲其行則壽皇不容不降免到宮
之旨其心非不願陛下之來自古人君處骨肉之間
多不與外臣謀而與小臣謀之所以交關日深疑隙

日大臣所憂者外無韓琦富弼呂誨司馬光之臣而
小人之中已有任守忠者在焉惟陛下裁察居亡何
光宗朝重華都人懽悅尋除起居舍人述祖宗之法
為內治聖鑑以進他日龜年又奏臣所居之官以記
注人君言動為職車駕不過宮問安如此書者又數
十矣恐非所以示後有旨幸玉津園龜年奏不奉三
宮而獨出宴遊非禮也屬上視朝龜年不離班位伏
地叩額久不已血漬鬢鬢光宗曰素知卿忠直欲何

言龜年奏今日無大於不過宮光宗曰須用去光宗
崩寧宗受禪是夕召對寧宗感額云前但聞建儲之
義豈知遽踐大位龜年奏此乃宗祏所係陛下安得
辭尋除侍講遷吏部侍郎兼侍讀龜年知事勢將變
會暴風震雷因極陳小人竊權號令不時之弊遣充
金國弔祭接送伴使初朱熹與龜年約共論韓侂冑
之奸會龜年護客熹以上疏見絀龜年聞之附奏云
始臣約熹同論此事今熹既罷臣宜併斥不報迨歸

見侂冑用事權勢重於宰相於是條數其奸尋以煥
章閣待制知江陵府湖北安撫使丐祠以呂梈言落
職追三官勒停嘉泰元年復元官以待制寶謨閣致
仕卒所著書有經解祭儀五致錄奏議外制侂冑誅
林大中樓鑰皆白其忠詔贈寶謨閣直學士賜謚忠
肅

宋史

徐夢莘字商老臨江人紹興進士為南安軍教授改知
湘陰縣會湖南帥括田號增耕稅他邑奉令惟謹夢

莘獨謂邑無新田租稅無從出尋主管廣西轉運司
文字時朝廷議易二廣鹽法遣廣西安撫司幹官朝
廷直與東西漕臣集議於境夢莘從行謂廣西阻山
正當仍官般法則害不及民廣東諸郡並江或可容
客販未宜遽以二廣概行議與廷直不合夢莘既知
賓州猶以前議為梗法罷去十三年二廣商賈毀業
民苦無鹽復從官般法矣夢莘恬於榮進每念生於
靖康之亂思究見顛末乃網羅舊聞會莘同異為三

朝北盟會編三百五十卷自政和七年海上之盟訖
紹興三十一年完顏亮之斃上下四十五年凡曰敕
曰制誥詔國書書疏奏議記序碑志登載靡遺帝聞
而嘉之擢直祕閣平生多所著有集補會錄讀書記
志集醫錄集仙錄皆以儒學冠之卒年八十二弟得
之從子天麟得之字思叔淳熙進士部使者以廉吏
薦以通直郎致仕安貧樂分不貪不躁著左氏國紀
史記年紀作具敝篋筆畧鼓吹詞柳江志天麟字仲

祥開禧進士調撫州教授歷湖廣總領所幹辦公事
臨安府教授武學博士輪對言人主當持心以敬通
判惠潭二州權英德府所至有惠政著西漢會要七
十卷東漢會要四十卷漢兵本末一卷西漢地理疏
六卷山經三十卷

宋史

楊辦字正伯新喻人父沒盡以田園遜其兄紹興進士
吉水令歲饑亟發常平粟賑之累官司農少卿以直
顯謨閣知明州會海寇劫掠辦捕擒之海道平改知

寧國卒子直清字叔裕永新令邑多強宗直清不為
撓竟中飛語按驗無狀改知平陽

人物志

張紱字子儀清江人紹興進士主澧陽簿為政廉勤綽
有時譽調衡州錄事叅軍改宜春丞為人孝友自衡
扶櫬歸值秋旱舟不能前禱神江忽暴漲衡人異之

林志

按張紱洽之父所著有愚谷集十五卷歷代史年
表二十卷

劉荀字子卿清江人嘗從胡寅於新州又從張九成於
南安凡有得二公緒言皆筆之名曰思問記淳熙中
知餘干縣未滿適周必大入相以荀為首薦改判德
安知盱眙軍所著有政規四十卷

人物志

按林志劉荀所著政規之外尚有明本三卷座右
記三卷文源八卷痴兒錄五卷德安守禦三卷都
梁記問八卷邊防指掌圖三卷南北聘使錄三卷
楊愿字謹仲申之曾孫銳志於學鄉之後進多出其門

年四十方登第官車輅院上章乞歸人稱壽岡先生

為文典雅不尚艱深所著有壽岡集八卷

林志

嚴時亨字亨父新喻人隱居不仕師事朱子有疑義問

答往復書帖今祠學宮

縣志

王光祖字仲顯臨江人孝友坦易喜讀書知衡陽受知

部使者辟守昭潭改瓊州嘗病廣右鹽法不便光宗

即位以光祖為提舉兩路鹽盡行公私便之卒於官

府志

楊扶字圖南新淦人性方介不苟合判袁州以爭訟事
忤郡將拂衣去官不復起自號竹溪居士胡忠簡周
益公皆與之遊築室曰秀野忠簡為之記

人物志

向士虎字伯虎子諱孫七歲時聞祖誦陶靖節詩竦聽
若有所得及登仕果無宦情授茂名尉及瓜代不忍
去親側志不復仕丞相周必大以隱逸薦不就適意
賦詩每有物外之趣自號桂隱散人有桂隱集

林志

彭鉉龜年次子以父澤錄用嘗為寧都幹辦累知贛州

捐逋賦二十萬擢直寶謨閣湖南漕所著臨川可否

錄備寇議事錄

同上

李仲發新淦人幼孤事二母俱孝生母侯氏病革仲發割股肉手熟以進母啜之愈有橘產於廷二本合幹揚萬里為扁堂曰橘瑞艮齋謝諤記之侯氏沒誠齋題其墓曰李孝子生母侯孺人墓

縣志

按李仲發林志訛入元臨江府志承其繆所敘橘瑞事亦與此小異

曾三復字無玷臨江人乾道進士淳熙末為主管官告院遷太府寺簿歷將作太府丞紹熙初出知池州改常州召拜監察御史進起居舍人兼權刑部侍郎以疾告老詔守本官職致仕三復性耿介恥奔競故位不速進在臺餘兩年持論不隨不激其沒也士論惜之宋史

按曾三復人物志以為峽江人者訛

曾三聘字無逸臨江新淦人乾道進士調贛州司戶叅

軍累遷軍器監主簿有旨造划車弩三聘謂划車弩
六人挽之而箭之所及止二百六十步今所用克敵
弓較之工費不及十之三一一人挽之而射可及三百
六十步利害曉然乃不果造光宗不朝重華宮中外
疑懼三聘以書抵丞相留正正未及言會以他事不
合求去三聘謂凡今闕庭之內父子夫婦之際羣臣
莫敢深言者避嫌遠罪耳丞相身退計決言之何嫌
乎帝欲幸玉津園三聘上疏言今人心既離大亂將

作小大之臣震怖請命而陛下安意肆志而弗聞知
萬一敵人諜知馳一介之使問安北宮不知何以答
之孝宗病革復上疏言道路流言洶洶日甚臣恐不
幸而有狂夫姦人託忠憤以行詐假曲直以動衆至
此而後悔之則恐無及矣帝意為動及孝宗崩帝疾
不能執喪朝論益震洶三聘謂今日事勢莫若建儲
寧宗立兼考功郎後知郢州會韓侂冑為相指三聘
為故相趙汝愚腹心坐追兩官久之復元官侂冑誅

諸賢遭竄斥者相繼召用三聘祿不及終不自言嘉

熙間特贈三官直龍圖閣賜謚忠節

同上

按曾三聘三復之弟其為新淦人史傳甚明人文
紀畧正氣錄以為吉水人者皆訛人物志既以為
吉水人又以為峽江人兩處重見者尤訛楊誠齋
淳熙薦士錄自朱熹以下凡六十人曾三復三聘

兄弟與焉

原跋

陳琦字擇之清江人乾道進士初主衡陽簿辯雪冤獄

賑荒柳桂糴無躡籍民甚德之後為丞相留正辟主
管機宜文字在蜀二年事無鉅細多資焉卒於官琦
為人明敏鎮密雖嚴而恕能文善古律有克齋集藏
於家

林志

韋楫字濟川清江人學極該博乾道五年乙科對策餘
二萬言知寧化縣倅房陵遷知宜州所至剖決無滯
獄祖有田廬悉以讓兄時清江上流有桐塘陂坑受
大江之衝壞民田二千頃楫按故法為築隄防水五

都之壤皆為上腴

人物志

按韋楫明一統志林志以為常楫未詳孰是

張洽字元德清江人從朱熹學自六經傳註而下皆究其旨歸至於諸史百家山經地志老子浮屠之說無所不讀時行社倉法洽請於縣貸常平米二百石建倉里中六年而歸其本於官鄉人利之嘉定元年中第授松滋尉改棗州司理叅軍有盜黠甚辭不能折會有兄弟爭財者洽諭之曰訟於官祇為胥吏之地

且冒法以求勝孰與各守分以全手足之愛乎辭意懇切訟者感悟盜聞之自伏民有殺人賄其子焚之居數年事敗洽治其獄無狀俄夢有人拜於庭示以傷痕在脅翌日委官上其事果然知永新縣一日謁告聞獄中有哭聲蓋獄吏受財乘間訊囚使誣服也洽大怒亟執付獄以薦通判池時天大旱禱不應洽言於守請蠲征稅催科以召和氣守為寬稅三日果大雨以病請祠袁甫提點江東刑獄以白鹿書院廢

弛聘洽為長端平初除直祕閣主管建康崇禧觀以疾乞致仕卒年七十七平居不異常人至義所當為則勇不可奪居閒不言朝廷事或因災變輒顰蹙不樂及聞一君子進用士大夫直言朝廷得失則喜見顏色所著書有春秋集注續通鑑長編事畧歷代郡縣地理沿革表文集

宋史

按人物志張洽謚文憲史傳失載

朱景文字元成清江人自幼讀書過目不忘經史百氏

蒐獵該貫為文立就雄贍豪爽如其人登乾道進士
調筠州司戶後調分宜簿未赴而卒

林志

按朱景文所著有批鱗藁五十篇文集十卷

劉誠之字子開少力學有大志乾道進士歷官州縣卓
有政績嘗為吏部郎後出提舉浙東常平除直祕閣
知平江府平反冤獄人以比錢若水云弟性之字子
仁登乙科為廣東經畧司幹官時蠻獠猖獗性之奉
帥檄督捕直擣峒穴擒其酋長後為荊湖制置司叅

議官擢知峽州秩滿陞監察御史終太府丞奉祠人

物志

蔡浩然字養正清江人乾道進士為兩郡博士興學育才郡臺皆器之改知安化邑抵溪峒素號難治視篆未幾去猾吏抑豪強溪峒悉安用薦授南安通判以疾奉祠去

同上

曾三英三聘弟嘗考三國六朝攻守事迹著南北邊籌

八十卷又著蒙史

林志

曾三異字無疑三聘弟少有詩名淳熙貢於鄉朝臣以
遺逸薦召為祕省校勘辭再召奏事除大社令力求
去號雲巢先生作墨戲為世所稱著新舊官制通考
通釋等書

人物志

徐筠字國堅得之長子早歲擢第初主攸縣簿後知金
州乞免本州和糴郡人刻石記其事又肖像以祀嘗
為漢官考四卷其餘若周禮微言姓氏源流等書皆
藏於家

林志

趙希循字良叔慶元進士嘗以漢書七論受知於真西山樓攻媿監進奏院以疾辭時相惜其去慰勞甚勤後知汀州除直祕閣奉祠有會心錄

同上

蕭翦字則山新喻人紹定進士以史館校勘遷武學博士進太府丞求補外遂奉祠得肆力於文字碑銘記序得盤詰體工篆隸凡名勝扁額多其所書尤善吟咏有大山集弟泰來字陽山登紹定第累擢監察御

史有小山集

同上

王選字少登清江人嘉熙進士授零陵簿東安盜起奉
帥檄督捕盜平特差湖北帥幹尋改知醴陵生平力

學飭行遠近師之

人物志

按王選所著有草窗文集

王札字季朋起家門蔭歷沿江制閫幕以能擢守竟陵
時襄陽失守郡當要衝兩被重圍竭力固守人皆効
死卒完城轉朝請郎以母老奉祠

同上

陳茂濂字孟溪新淦人淳祐進士主新昌簿定版籍理

稅畝邑黠吏有以賄恃勢誣邑屬者以法籍其家邑中肅然調郴州司理會文天祥領鎮湖南檄為憲幕天祥移贛州濂攝幹官護視司事累官至從政郎歸老於鄉

林志

傅實之字莊父清江人登寶慶第調分宜簿時祖母蕭氏壽百有八歲母楊氏亦八十餘蕭卒以嫡孫承重不赴官弟謙之字溫父開禧甲子以春秋首選當陞對亦以母老不赴兄弟怡怡承歡一室文行為鄉里

所推學者以南齋西齋先生稱之太守名其地為慶壽里後以薦召言事獻八箴十事俱稱旨授承事郎

所著有春秋幼學記南齋記

同上

孔鑑字規祖臨江人少刻苦精於詞賦中年崇尚理學與修江李燔余宗傑為友每為一集質疑辨難剖析精微後學宗之

同上

徐卿孫字麟仲清江人景定進士才猷穎捷由善化主簿歷官左正言薦李芾文天祥可共患難卒如其言

同上

黃祁字希宋清江人少孤力學自奮早以能賦稱郡博士以其經明行修延入學宮為後進楷範累舉對策入高等調高安簿時高安邑壯事繁令多分委予奪民德之後歸老於家所著有德菴類稿三卷詩稿二

十卷集錄十卷

同上

黎立武字以常新喻人咸淳進士授隆興判官歲饑同僚請籍富戶賑貧民謂殺一牛以活萬蟻立武駁之

曰萬蟻固可憐一牛何罪而死衆稱善乃止累遷國子司業文華閣待制考試臨川得草廬吳澄時稱其知人其學宗白雲郭氏人物志

按黎立武行歷詳吳草廬集元中子碑文稱其年二十六擢進士第三人大父母父母具存明年奉四親之官一時以為榮累官至國子司業而宋亡傳中庸之學於新喻謝尚書平生著述積橐如山演繹舊聞敷暢新得有圖有贊有講議諸篇悉錄

諸本今其書無一傳者

原跋

羅夢棧字德玉新喻人寶祐四年特奏名授靖安尉庚申兵入境夢棧率民兵固守已而兵大至巷戰死之事聞贈宣教郎蔭其子金鉉從政郎

安志

按安志孝義傳有清江趙孟玖者割股愈母疾有司以篤孝旌其門同邑尚有劉師文新喻何從新淦郭林蕭大臨弟大受俱以孝義稱附姓名於此

江西通志卷七十三